

Emne nr. 48

### GRENSER OG GRENSEMERKE MELLOM EIGEDOMAR

Med denne lista vil vi freista å få greie på dei nemningane ("benevnelsene") som bygdemålet frå gamalt nytta om grenser og grensemerke mellom eigedomar, og stadnamn som knyter seg til dei. Medarbeidaren tek berre med nemningar som fanst i bygdemålet i den eldste tida og ser bort frå andre ord som kan ha kome inn i bygdemålet frå normalspråket; dei fleste stader i landet er vel ordet "grense" ei slik nemning som har kome inn i bygdemålet i seinare tid. Det er viktig at nemningane og namna vert skrivne så nær opp til uttalen i bygdemålet som mogeleg, men medarbeidaren skal ikkje nytta lydskrift. Nemningane bør verta oppgjevne både i bunden og ubunden form, slik at det går fram kva kjønn ordet hadde. Nemningane bør setjast i hermeteikn.

#### I. Grense mellom eigedomar

1. Kva namn hadde dei i bygdemålet på grense mellom to bruk av same garden? (Om døme, sjå etter sp. 5.)

Med "gard" er her meint ei samling av gardsbruk som er delear av ein einskild opphavleg gard og som framleis har sams gardsnamn (Ås, Nes, osv.); med "bruk" er meint dei einskilte partane som denne ophavlege einskapen kan vera delt i, og som kan ha serskilte bruksnamn (Nils-bruket, Ola-jorda, Oppiogard, Nistova, Nitun o. l.).

2. Dersom bruka hadde jorda i fleire stykke som låg om kvarandre, kva ord nytta dei då om grensa mellom dei ulike teigane?

3. Kva ord nytta dei om grense mellom to opphavleg sjølvstendige gardar (med ulike namn og/eller gardsnummer)?

4. Var det ulike ord for grensa dersom slike gardar låg til kvarandre med

a) innmark mot innmark,

b) innmark mot utmark

eller

c) utmark mot utmark.

Kva ord vart i tilfelle nytta i kvart høve?

5. Var det sers ord for grense mellom delar av eigedomane som låg heller langt frå innmark og heimemark, t. d. i fjellet?

Det kan vel henda at dei i mange bygder nytta same ordet eller orda i alle dei tilfella som er nemnde ovanfor. Vi vil gjerne få svar på alle spørsmåla likevel.

Til døme på namn som kan koma på tale i desse spørsmåla, kan vi nemna eit eller ei skifte (-a), eit byte eit dele eller deile, ei deild, ei markedeild eller mardeild, ein deldestreng eller berre streng, eit skil eller skjell, eit markeskil eller -skjell, ein skilvange, ei grense, eit landmerke, ei line, ei rør, ei rå, ei langrå, eit rådele eller rådeile.

6. Er nemningane eit "kann", "kannbyte", "kanningsbyte" o. l. kjende i bygdemålet frå gammalt? Vart slike nemningar i tilfelle bruka om eit serleg slag grense?

Ordet "kann" og nemningar som er samansette med det, vitnar oftast om ei einseitig grensefastsetjing, ved at ein gard har okkupert eit område og fastsett grensa sjølv. Jfr. ordelaget "Eg kann til meg".

7. Er det kjent noko stadnamn i bygda som er samansett med ei namning på grense, t. d. "Skjellbekken", "Deledalen", "Bytenuten", "Deila", "Deilsbakke", "Deildokk", "Deilrind", "Deilskos", "Merkebekk", "Skjellstad", "Bytet", o. l.?

Var det vanleg med slike naturlege grensemerke mellom gardane?

Slike stadnamn fell i hovudsak i to grupper: a) "Skjellbekken", "Skiftesbenne", "Byteåna", "Deledalen" o. l. Slike namn vitnar om at grensa var heilt naturleg. b) "Skiftesvika", "Delenuten", "Bytehamaren", "Skjelltinden", o. l. Slike namn vitnar oftast om at grensa var fastsett som rette liner mellom naturlege og karakteristiske punkt (t. d. frå "Skiftesvika" opp i "Bytehamaren".)

8. Korleis ordla dei seg når dei skulle segja at ein gard grensa til eller mot ein annan gard? T. d. "Vi skifter med Dal". "- bytest mot -", "- har dele mot -", "- vallar mot -" e. l.

## II. Eiegdomsgrense mot og i sjøen

9. Kjenner De noko eigedomsgrense mot sjøen og kva vart den kalla (marbakke, molbakke, (moldbakke), landbakke e. a.)? Om det ikkje er marbakke, kvarhelst går då grensa (der ein man ikkje kan stå botn, der ein helst ikkje kan stå botn, der ein kval kan flyta, så langt ujte som eit steinkast, eit pilskot eller eit børseskot frå land, på 3-4 famner djupne eller på 2 m djupne ved vanleg fjære sjø)?
10. Har grunneigaren (landeigaren) retten til å ta sand opp av botnen, og kor langt ut går då den retten?
11. Har grunneigaren retten til å ta tang og tare frå botnen, og kor langt ut går då den retten? Gjeld same retten for ålegras (marlauk)?
12. Kan kven som helst ta ostre (østers) eller agnskjell, eller har grunneigaren einerett på det, og kor langt ut går då den retten?
13. Grunneigaren har til vanleg eineretten til å setja ut kilnot etter laks og likeeins eineretten til å fiska etter laks med sitjenot (verpenot) og krokarn. Kjenner De noko unnatak frå den regelen, stader der kilnotfisket er fritt?
14. Kjenner De nokon stad der fisket med botngarn er fritt?
15. Kjenner De nokon stad der fisket med sitjenot (verpenot) etter makrell er fritt?
16. Vert det nytta slik reidskap etter annan fisk enn laks og makrell, og kjenner De nokon stad der slikt fiske er fritt?
17. I regelen har grunneigaren eller bygdefolket ingen førerett til å fiska etter hummar med teine, men sume stader har dei etter sedvane unnatak frå den regelen. Kjenner De nokon slik unnataksregel, og kva går den ut på?
18. Kjenner De nokon stad der berre grunneigaren har rett til å fiska med kastenot, og kor langt går då den retten?
19. Kjenner De nokon stad der grunneigaren har einrett til å setja garn i sjøen utanfor sitt land?
20. Når ein fiskar set ut garn eller teiner som skal stå frå kvelden til morgonen, vert det mange stader rekna for fullt

lovleg at han knyter garntoget fast i tre, steinar e. a. på annan manns grunn. Andre stader reknar dei slikt for ulovleg. Kva er regelen i den bygd De bur i?

21. Finst det i den bygda De bur i gamle kval-vågar eller sel-vær. Der grunneigaren har retten til å fanga kval eller sel (kobbe)?

22. Kjenner De til at det har vore grense mellom gardane ute på fiskegrunnane og kva kalla dei slike grenser?

### III. Eigedomsgrense i vassdrag

23. Har De høyrte om mar- eller molbakke, molbrøt, molrein, mærrrein eller mælrein i innsjø eller vatn, og kvarhelst går den bakken?

24. Kjenner De noko eigedomsgrense som fylgjer eller har fylgt eit vassdrag? Kor gjekk ho då (etter djupålen, djupvassfura, midtstraumen e. l.) og kva vart ho kalla?

25. Dersom grensa går etter djupålen og den flytter seg, rekna folk då at grensa òg flytter seg eller vert den verande på same staden?

### IV. Gard eller gjerde mellom eigedomar

26. Når det gjekk gard (gjerde) mellom eigedomar, kva kalla dei då garden eller gjerdet (merkesgard, bytesgard, skiftesgard, skjellgard e. a.)? Vi vil gjerne få vita om det var ulike namn etter som det var utmark på begge sider av garden eller gjerdet (markagard, utågjersgard), innmark på eine og utmark på andre sida eller innmark på begge sider, likeins om dei nytta ulike ord om ein slik gard eller gjerde etter som den skilde mellom to opphavlege gardar eller mellom to bruk av same garden.

(Dette har vi spurt etter tidlegare i spl. 15, Gjerde. Dei som har svar på denne lista og ikkje vil ha bryet med å svara på dette spørsmålet, kan lata det vera.)

### V. Grensemerke

27. Dersom det ikkje var gard (gjerde) langs grensa mellom to eigedomar, korleis var då grensa merkt? Var det nokon skilnad om

det galdt grense mellom to opphavlege gardar (sjå sp.3), mellom to bruk av same garden (sjå sp. 1) eller grense mellom teigane til dei ymse bruka av same teigdelte garden (sjå sp. 2)?

Det mest vanlege var å nytta kunstige grensemerke som krossar i berg eller jordfaste steinar, oppsette merkesteinar med to vitne eller vitnesteinar attmed, røysar, innhogne krossar i tre, nedsette jarnboltar o. l.

28. Kva ord hadde dei for slike merke, og var det skilnad på orda for merka ved dei ulike slag grenser som er nemnde under sp. 13?

Her er det òg mange ord og nemningar som kan koma på tale. Som døme nemner vi først ord for grensemerke i det heile: eit eller ei skifte (-a), eit dele eller deile, ei deild, eit skil- eller skjellmerke, eit kann, ei rør, ei rå, eit råmerke. Det kan òg vera ord for einskilde slag merke, som bytestein, del- eller deilestein, deildestein, mark- eller marstein, merkestein; bytetre, bytebjørk, bytefura, deletre, merketre, merkebjørk, merkefura, skiftefura.

29. Eit eige slag nemningar er "hornstav" og "stavstod" ("stabstod"); det var ord for serlege, viktige grensemerke. "Stavstod" er kjent frå Vest-Agder og Rogaland og var namn på merket der grensa for tre eller fleire opphavlege gardar støyte saman. Kjenner De desse orda eller andre ord for grensemerke som dei rekna for sers viktige, t. d. der tre eller fleire opphavlege gardgrenser støyte saman?

30. Kjenner De til at det vart lagt oske, glasbrot, krit, kol, never eller anna under merkesteinane? Kva skulle dette tena til?

31. Kjenner De frå bygda noko segn om deildegasten, ein som måtte gå att etter døden fordi han hadde flytt deildesteinar?

32. Kjenner De frå bygda nokor segn om at folk har vist vitet fordi dei har flytt merkesteinar?

33. Vert det fortalt eller kjenner De døme på at den som skulle læra frå seg grensene til ettermannen sin, gav denne eit slag under øyra kvar gong han nemnde namnet på eller viste han ein stad der det stod ein merkestein?